


















古樂苑卷之十一

相和歌辭

相和曲

雜鳴







古樂苑卷第十五

西吳 梅鼎祚 補正

東越 呂胤昌 校閱

相和歌辭

相和曲 四弦曲

吟歎曲

相和曲 二

雞鳴

樂府解題曰古詞雞鳴初言天下方太平次言置酒作樂終言桃傷李什喻兄弟當

相為表裏三人近侍榮耀道路與相逢狹路間行同詩紀云此詩前後辭不相屬蓋采詩人樂合而成章邪抑有錯簡紊誤也又有雞鳴高樹巔出此

古辭

雞鳴高樹巔。狗吠深宮中。蕩子何所之。天下方太平。刑





法非有貸柔協正亂名

此上疑別一曲

黃金爲君門碧玉爲軒

堂上有雙樽酒作使邯鄲倡劉玉碧青甃後出郭門王

舍後有方池池中雙鴛鴦鴛鴦七十二羅列自成行鳴

聲何啾啾聞我殿東廂兄弟四五人皆爲侍中郎五日

一時來觀者滿路傍黃金絡馬頭頰頰何煌煌桃生露

井上李樹生桃傍蟲來齧桃根李樹代桃殭樹本身相

代兄弟還相忘

右一曲魏樂所奏

雞鳴篇

郭左並作劉孝威藝文作簡文帝

劉孝威

峙雞識將曙長鳴高樹巔啄葉疑障羽桃花彊欲前意  
氣多驚舉飄颺獨無侶陳思助鬪協狸膏郤昭妬敵



安金距丹山可愛有鳳皇金門飛舞有鴛鴦何如五德  
美豈勝千里翔

同前

隋岑德潤

鐘響應繁霜晨雞錦臆張簾迥猶侵露枝高已映光排  
空下朝揭奮翼上花場雨晦思君子關開脫孟嘗既得  
依雲外安用集陳倉

雞鳴高樹巔

梁簡文帝

碧玉好名倡夫婿侍中郎桃花全覆井金門半隱堂時  
欣一來下復比雙鴛鴦雞鳴天尚早東烏定未允

晨雞高樹鳴

詩紀云阮籍詠懷詩晨雞鳴高樹命駕起旋歸則此非樂府也



解題亦云出雞  
鳴古辭似誤

陳張正見

晨雞振翮鳴出迴擅奇聲蜀郡隨金馬天津應玉衡摧  
冠驗遠石繫火出連營爭棲斜揭暮解翼橫飛度試飲  
淮南藥翻上仙都樹枝低且候潮葉淺還承露承露觸  
嚴霜華淺伺朝陽猜羣怯寶劒勇戰出花塲當損黃金  
距誰論白玉璫長鳴逢晉帝恃氣遇周王流名說魯國  
分影入陳倉不復愁苻朗猶能感孟嘗

烏生

一曰烏生八九子樂府解題曰古辭言烏  
母子本在南山巖石間而來爲秦氏彈丸

所殺白鹿在苑中人得以爲脯黃鵠摩天鯉  
在深淵人得而烹煮之則壽命各有定分死

生何待  
前後也

古辭



烏生八九子。端坐秦氏桂樹間。喈我秦氏。家有遊遨蕩  
子。工用睢陽彊。蘇合彈。左手持彊彈。兩丸。出入烏東西。  
喈我一丸。卽發中烏身。烏死魂魄飛揚上天。阿母生烏  
子時。乃在南山巖石間。喈我人民。安知烏子處。蹊徑窈  
窕安從通。白鹿乃在上林西苑中。射工尚復得白鹿脯。  
喈我黃鵠摩天極高飛。後宮尚復得烹煮之。鯉魚乃在  
洛水深淵中。釣鈎尚得鯉魚口。喈我人民。生各各有壽  
命。死生何須復道前後。

右一曲魏  
晉樂所奏

烏生八九子

城上烏  
出此

梁劉孝威

城上烏。一年生九雛。枝輕巢本狹。風多葉早枯。毳毛不



自煖張翼強相呼金柝嚴今翠樓肅蜃壁光今椒泥馥  
虞機衡網不得施猜鷹鷲隼無由逐永願共栖曾氏冠  
同瑞周王屋莫啼城上寒猶賢野間宿羽成翮備各西  
東丁年賦命有窮通不見高飛帝輦側遠託日輪中尚  
逢王吉箭猶嬰夏羿弓豈如變彩救燕質入夢祚昭公  
畱聲表師退集幕示營空靈臺已鑄像流蘇時候風

城上烏

梁吳均

嗚嗚城上烏翩翩尾畢逋凡生八九子夜夜啼相呼質  
微知慮少體賤毛衣麤陛下三萬歲臣至執金吾

同前

朱超



朝飛集帝城猶帶夜啼聲近日毛雖暖聞弦心尚驚

平陵東

崔豹古今注曰平陵東漢翟義門人所作樂府解題曰義丞相方進少子為東

郡太守以王莽方篡漢舉兵誅之不克見害門人作歌以怨之也

古辭

平陵東松柏桐不知何人刳義公刳義公在高堂下交  
錢百萬兩走馬兩走馬亦誠難顧見追吏心中惻心中  
惻血出漉歸告我家賣黃犢

右一曲魏晉樂所奏

同前

魏陳思王植

閭闔開天衢通被我羽衣乘飛龍乘飛龍與仙期東上  
蓬萊採靈芝靈芝採之可服食年若王父無終極

若一作與



# 陌上桑

一口豔歌羅敷行古今樂錄曰陌上桑歌瑟調古辭豔歌羅敷行日出東南隅

篇崔豹古今注曰陌上桑者出秦氏女子秦氏邯鄲人有女名羅敷爲邑人千乘王仁妻王仁後爲趙王家令羅敷出採桑於陌上趙王登臺見而悅之因置酒欲奪焉羅敷乃彈箏作陌上桑之歌以自明趙王乃止樂府解題古詞言羅敷採桑爲使君所邀盛誇其夫爲侍中郎以拒之與前說不同又有採桑亦出於此

## 古辭

日出東南隅照我秦氏樓秦氏有好女自名爲羅敷羅敷喜蠶桑採桑城南隅青絲爲籠係桂枝爲籠鉤頭上倭墮髻耳中明月珠細綺爲下裙紫綺爲上襦行者見羅敷下擔將髭鬚少年見羅敷脫帽著幘頭耕者忘其犁鋤者忘其鋤來歸相怨怒但坐觀羅敷

使君從南



來五馬立踟躕。使君遣吏往問是誰家姝。秦氏有好女。  
自名爲羅敷。羅敷年幾何。二十尚不足。十五頗有餘。使  
君謝羅敷。寧可共載不。羅敷前置辭。使君一何愚。使君  
自有婦。羅敷自有夫。二解東方千餘騎。夫婿居上頭。何用  
識夫婿。白馬從驪駒。青絲繫馬尾。黃金絡馬頭。腰中鹿  
盧劍。可直千萬餘。十五府小吏。二十朝大夫。三十侍中  
郎。四十專城居。爲人潔白皙。鬢髮頗有鬚。盈盈公府步。

三解 前有豔  
歌曲後有辭

右一曲魏晉樂所  
奏宋書作大曲

同前

楚辭鈔



今有人山之阿被服薜荔帶女蘿旣含睇又宜咲子戀  
慕予善窈窕乘赤豹從文狸辛夷車駕結桂旗被石蘭  
帶杜衡折芳拔荃遺所思處幽室終不見天路險艱獨  
後來表獨立山之上雲何容容而在下杳冥冥羌晝晦  
東風飄飄神靈雨風瑟瑟木杹杹思念公子徒以憂

右一

曲魏晉  
樂所奏

同前

魏武帝

駕虹蜺乘赤雲登彼九疑歷玉門濟天漢至崑崙見西  
王母謁東君交赤松及羨門受要祕道愛精神食芝英  
飲醴泉柱杖桂枝佩秋蘭絕人事遊渾元若疾風遊歛



飄飄景未移行數千壽如南山不忘愆

飄一作翩右一曲晉樂所奏

同前

魏文帝

棄故鄉離室宅遠從軍旅萬里客披荊棘求阡陌側足  
獨窘步路局乍虎豹嗥動雞驚禽失羣鳴相索登南山  
奈何蹈盤石樹木叢生鬱差錯寢蒿草蔭松柏涕泣雨  
面霑枕席伴旅單稍稍日零落惆悵竊自憐相痛惜

右一曲

曲魏晉樂所奏

同前

見太平御覽

陳思王植

望雲際有真人安得輕舉繼清塵執電鞭騁飛麟

闕

同前

梁吳均



娑娑陌上桑蔭陌復垂塘長條映白日細葉隱鸝黃蠶  
饑妾復思拭淚且提筐故人寧知此離恨煎人腸

同前

一作周王褒

王筠

人言陌上桑未曉已含光重重相蔭映軟軟自芬芳秋  
胡方倚馬羅敷未滿筐春蠶朝已老安得久徬徨

軟軟一作

軟弱方一作始

同前

二首一云採桑郭本前首作王臺卿左本後作王筠

蕭子顯

令月開和景處處動春心挂筐須葉滿息倦重枝陰  
日出秦樓明條垂露尚盈蠶饑心自急開奩粧不成

同前

四首

王臺卿



鬱鬱陌上桑盈盈陌上女送君上河梁拭淚不能語  
鬱鬱陌上桑遥遥山下蹊君去成萬里妾來守空閨  
鬱鬱陌上桑皎皎雲間月非無巧笑姿皓齒爲誰發  
鬱鬱陌上桑裊裊機頭絲君行亦宜返今夕是何時

豔歌行

晉傅玄

日出東南隅照我秦氏樓秦氏有好女自字爲羅敷首  
戴金翠飾耳綴明月珠白素爲下裾丹霞爲上襦一顧  
傾朝市再顧國爲虛問女居安在堂在城南居青樓臨  
大巷幽門結重樞使君自南來駟馬立踟躕遣吏謝賢  
女豈可同行車斯女長跪對使君言何殊使君自有婦



賤妾有鄙夫天地正厥位願君改其圖

同前

陳張正見

城隅上朝日斜暉照杏梁併倦茱萸帳爭移翡翠牀縈  
環聊向牖拂鏡且調粧裁金作小靨散麝起微黃二八  
秦樓女三十侍中郎執戟超丹地豐貂入建章未安文  
史閣獨結少年場彎弧貫月影學劒動星芒翠蓋飛城  
曲金鞍橫道傍調鷹向新市彈雀往睢陽行行稍有極  
暮暮歸蘭房前瞻富羅綺左顧足鴛鴦蓮舒千葉氣燈  
吐百枝光滿酌胡姬酒多燒荀令香不學幽閨妾生離

怨採桑

月一作葉



羅敷行

梁蕭子範

城南日半上微步弄妖姿含情動燕俗顧景笑齊眉不  
憂桑葉盡還憶畏蠶飢春風若有顧惟願落花遲

同前

陳顧野王

東隅麗春日南陌採桑時樓中結梳罷提筐候早期風  
輕鶯韻緩霜灑落花遲五馬光長陌千騎絡青絲使君  
徒遣信賤妾畏蠶饑

同前

北魏高允

邑中有好女姓秦字羅敷巧笑美回盼鬢髮復凝膚脚  
著花文履耳穿明月珠頭作墮馬髻倒枕象牙梳娉娉



善趨步襜褕曳長裾王侯爲之顧駟馬自踟躕

日出東南隅行

一云羅敷豔歌

晉陸機

扶桑升朝暉照此高臺端高臺多妖麗濟房出清顏淑  
貌耀皎日惠心清且閑美目揚玉澤蛾眉象翠翰鮮膚  
一何潤秀色若可餐窈窕多容儀婉媚巧笑言莫春春  
服成粲粲綺與紈金雀垂藻翹瓊佩結瑤璫方駕揚清  
塵濯足洛水澗藹藹風雲會佳人一何繁南崖充羅幕  
北渚盈軒軒清川含藻景高岸被華丹馥馥芳袖揮泠  
泠纖指彈悲歌吐清響雅韻播幽蘭丹脣含九秋妍迹  
凌七盤赴曲迅驚鴻蹈節如集鸞綺態隨顏變沈姿無



定源俯仰紛阿那顧步咸可懽遺芳結飛颺浮景映清  
湍冶容不足詠春遊良可歎

韻一作舞  
定一作乏

同前

宋謝靈運

柏梁冠南山桂宮耀北泉晨風拂幃幌朝日照閨軒美  
人臥屏席懷蘭秀瑤璠皎潔秋松氣淑德春景暄

疑闕

同前

梁沈約

朝日出邯鄲照我叢臺端中有傾城豔顧景織羅紈延  
軀似纖約遺視若回瀾瑤裝映層綺金服炫雕欒幸有  
同匡好西仕服秦官寶劒垂玉具汗馬飾金鞍縈場類  
轉雪逸控寫騰鸞羅衣夕解帶玉釵暮垂冠

寫一作似



同前

張率

朝日照屋梁夕月懸洞房專遽自稱豔獨  
伊覽光雖資自然色誰能棄薄粧施著見朱粉點畫示頰黃含貝  
開丹吻如羽發清揚金碧旣簪珥綺縠復衣裳方領備  
蟲彩曲裙雜鴛鴦手操獨繭緒唇凝脂燥黃

同前

蕭子顯

大明上迢迢陽城射凌霄光照牕中婦絕世同阿嬌明  
鏡盤龍刻簪羽鳳凰雕逶迤梁家髻冉冉弱楚宮腰輕紈  
雜重錦薄縠間飛綃三六前年暮四五今年朝蠶籠拾  
芳翠桑陌採柔條出入東城里上下洛西橋忽逢車馬



客飛蓋動襜褕單衣鼠毛織寶劒羊頭鞘丈夫疲應對  
從者輟銜鑣柱間徒脉脉垣上幾翹翹女本西家宿君  
自上宮要漢馬三萬疋夫聳仕嫖姚輦囊虎頭綬左珥  
鳬盧貂橫吹龍鐘管奏鼓象牙簫十五張內侍十八賈  
登朝皆笑顏郎老盡訝董公超

丈一作大從一作御公一作生

同前

一云豔歌行

陳後主

重輪上瑞暉西北照南威南威年二八開牖敞重闈當  
壚送客去上苑逐春歸髻下珠勝月牕前雲帶衣紅裙  
結未解綠綺自難微

同前

徐伯陽



丹城壁日映朱扉青樓含照本暉暉遠映陌上春桑葉  
斜入秦家綰綺衣羅敷粧粉能佳麗鏡前新梳倭墮髻  
圓籠裊裊挂青絲鐵鈎冉冉勝丹桂蠶飢日晚慙生愁  
忽逢使君南陌頭五馬停珂遣借問雙臉含嬌特好羞  
妾壻府中輕小吏卽今來往專城裏欲識東方千騎歸  
藹藹日暮紅塵起

丹一作朱  
映一作啓

同前

殷謀

秦樓出佳麗正值朝日杳陌頭能駐馬花處復添香

同前

一題云  
陌上桑

周王褒

曉星西北沒朝日東南隅陽牕臨玉女蓮帳照金鋪鳳



樓稱獨立絕世良所無鏡懸四龍網枕畫七星圖銀鏤  
明光帶金地織成襦調絃大垂手歌曲鳳將雛採桑三  
市路賣酒七條衢道逢五馬客夾轂來相趨將軍多事  
藝夫聳好形模高箱照雲母壯馬飾當顧單衣火浣布  
利劒水精珠自知心所愛仕宦執金吾飛薨彫翡翠繡  
桷畫屠蘇銀燭附彈映雞羽黃金步搖動襜褕兄弟五  
日時來歸高車竟道生光輝名倡兩行堂上起鴛鴦七  
十階前飛少年任俠輕年月珠丸出彈遂難追

藝一作勢

同前

郭本日出行

蕭撝

昏昏隱遠霧團團乘陣雲正值秦樓女含嬌酬使君



同前

隋盧思道

初月正如鉤懸光入綺樓中有可憐妾如恨亦如羞深  
情出豔語密意滿橫眸楚腰寧且細孫睂本未愁青玉  
勿當取雙銀詎可畱會待東方騎遙居最上頭

可畱一作肯畱

採桑

宋鮑照

季春梅始落工女事蠶作採桑淇洧間還戲上宮閣早  
蒲時結陰晚篁初解籜藹藹雲滿閨融融景盈幕乳燕  
逐草蟲巢蜂拾花藥是節最煊妍佳服又新爍歛歎對  
迴塗揚歌弄場藿抽琴試紆思薦佩果成託承君郢中  
美服義久心諾衛風古愉絕鄭俗舊浮薄靈願悲渡湘



宓賦笑灑洛盛明難重來淵意爲誰涸君其且調絃桂

酒妾行酌

篁一作竹雲滿一作竹霧灑欽  
一作縣迴一作回廊陸一作景

同前

郭本  
未全

梁簡文帝

春色映空來先發院邊梅細萍重疊長新花歷亂開連  
珂往淇上接幰至叢臺叢臺可憐妾當牕望飛蝶忌跌  
行衫領熨斗成褫禡下牀著珠珮捉鏡安花鑷薄晚畏  
蠶飢競採春桑葉寄語採桑伴訝今春日短枝高攀不  
及葉細籠難滿年年將使君歷亂遣相聞欲知琴裏意  
還贈錦中文何當照梁日還作入山雲重門皆已閉方  
知留客袂可憐黃金絡複以青絲繫必也爲人時誰令



畏夫婿

淇上一作河上  
襦襦一作裙襦

同前

集云同郭  
侍郎採桑

姚翻

鴈還高柳北春歸洛水南日照茱萸領風搖翡翠簷桑  
間視欲暮閨裏遽飢蠶相思君助取相望妾那堪

同前

沈君攸

南陌落花移蠶妾畏桑萎逐便牽低葉爭多避小枝摘  
駛籠行滿攀高腕欲疲看金怯舉意求心自可知

同前

英華題云和  
洗馬古意

吳均

賤妾思不堪採桑渭城南帶減連枝繡髮亂鳳凰簷花  
舞依長薄蛾飛愛綠潭無由報君信流涕向春蠶



同前

集題云萬山見採桑人姑從郭本收入

劉邈

倡妾不勝愁結束下青樓  
逐伴西城路相攜南陌頭  
葉盡時移樹枝高任易鉤  
絲繩提且脫金籠寫復收  
蠶飢日欲暮誰爲使君畱

城一作郊提一作挂復一作仍欲一作已

同前

陳後主

春樓髻梳罷南陌競相隨  
去後花叢散風來香處移  
廣袖承朝日長鬟礙聚枝  
柯新攀易斷葉嫩摘前萎  
採繁鈎手弱微汗雜粧垂  
不應歸獨早堪爲使君知

同前

張正見

春樓曙鳥驚蠶妾候初晴  
迎風金珥落向日玉釵明  
徙



顧移籠影攀鈎動釧聲葉高知手弱枝軟覺身輕人多  
羞借問年少怯逢迎恐疑夫婿遠聊復答專城

同前

賀徹

蠶妾出房櫳結伴類花叢度水春衫綠映日晚粧紅釧  
聲時動樹衣香自入風鈎長從枝曲葉盡細條空競採  
須盈手爭歸欲滿籠自憐公府步誰與少年同

同前

傅緯

羅敷試採桑出入城南傍綺裙映珠珥絲繩提玉筐度  
身攀葉聚聳腕及枝長空勞使君問自有侍中郎

吟歎曲



古今樂錄曰張永元嘉技錄吟歎四曲一曰大雅吟二曰王明君三曰楚妃歎四曰王子喬大雅吟王明君楚妃歎並石崇辭王子喬古辭王明君一曲今有歌大雅吟楚妃歎二曲今無能歌者古有八曲其小雅吟蜀琴頭楚王吟東武吟四曲闕

# 大雅吟

晉石崇

堂堂太祖淵弘其量仁格宇宙義風遐暢啓土萬里志在翼亮三分有二周文是尚於穆武王奕世載聰欽明沖默文思允恭武則不猛化則時雍庭有儀鳳郊有遊龍啓路千里萬國率從蕩清吳會六合乃同百姓仰德良史書功超越三代唐虞比蹤

右一曲晉樂所奏

王明君

一曰王昭君漢書曰竟寧元年呼韓邪來朝言願婿漢氏以後宮良家子王嬪



妃之生一子株累立復妻之生二女范曄書  
 曰昭君入宮久不見御積怨因掖庭令請行  
 單于臨辭大會豐容靚飾顧影徘徊悚動左  
 右帝驚悔欲復留而重失信夷狄遂與之生  
 二子西京雜記曰漢元帝後宮既多不得常  
 見乃使畫工圖其形按圖召幸宮人皆賂畫  
 工多者十萬少者亦不減五萬昭君自恃其  
 貌獨不與乃惡圖之及後匈奴入朝選美人  
 配之昭君之圖當行及入辭光彩射人悚動  
 左右天子方重信外國悔恨不及窮按其事  
 畫工有杜陵毛延壽爲人形醜好老少必得  
 其真安陵陳敞新豐劉白龔寬並工爲牛馬  
 飛鳥衆藝人形好醜不逮延壽下杜陽望樊  
 青尤善布色同日棄市籍其家資皆巨萬昭  
 君在胡作詩以怨思云琴操曰昭君本齊國  
 王穰女端正閒麗穰以其有異人求之不與  
 年十七進之帝以地遠不幸欲賜單于美人  
 嬙對使者越席請往後不願妻其子吞藥而  
 卒韓子蒼云其事襍出無所考正言不願妻  
 其子而詔使從胡俗此是烏孫公主非昭君



也要之琴操寂抵牾矣唐書樂志曰明君漢曲也石崇自序曰王明君本名昭君以觸文帝諱故晉人謂之明君初武帝以江都王婕妤細君爲公主嫁烏孫王昆莫令琵琶馬上作樂以慰其道路之思送明君亦然也其造新之曲多哀怨之聲晉宋以來明君止以絃隸少許爲上舞而已梁天監中斯宣達爲樂府令與諸樂工以清商兩相間絃爲明君上舞傳之至今王僧虔技錄云明君有閒絃及契注聲又有送聲謝希逸琴論曰平調明君三十六拍胡笳明君二十六拍清調明君十三拍閒絃明君九拍蜀調明君十二拍吳調明君十四拍杜瓊明君二十一拍凡有七曲琴集曰胡笳明君四弄有上舞下舞上閒絃下閒絃明君三百餘弄其善者四焉又胡笳明君別五弄辭漢跨鞍望鄉奔雲入林是也

### 晉石崇

我本漢家子將適單于庭辭訣未及終前驅已抗旌僕



御涕流離轅馬悲且鳴哀鬱傷五內泣淚沾朱纓行行  
日已遠遂造匈奴城延我於穹廬加我閼氏名殊類非  
所安雖賢非所榮父子見陵辱對之慙且驚殺身良不  
易默默以苟生苟生亦何聊積思常憤盈願假飛鴻翼  
藥之以遐征飛鴻不我顧佇立以屏營昔爲匣中玉今  
爲糞上英朝華不足嘉甘與秋草并傳語後世人遠嫁  
難爲情

嘉一作歡  
一曲晉樂所奏

王昭君

宋鮑照

既事轉蓬遠心隨鴈路絕霜鞞旦夕驚邊笳中夜咽

同前

梁施榮泰



垂羅下椒閣舉袖拂胡塵唧唧撫心歎蛾眉誤殺人

同前

玉臺題云  
昭君辭

周庾信

拭啼辭戚里回顧望昭陽鏡失菱花影釵除却月梁圍  
腰無一尺垂淚有千行綠衫承馬汗紅袖拂秋霜別曲  
真多恨哀絃須更張

綠衫一作衫身

同前

無名氏

猗蘭恩寵歇昭陽幸御稀朝辭漢闕去夕見胡塵飛寄  
信秦樓下因書秋鴈歸

明君詞

英華題云  
昭君怨

梁簡文帝

玉艷允搖質金鈿婉黛紅一去蒲萄觀長別披香宮秋



唐照漢月愁帳入胡風  
妙工偏見詆無由情恨通

同前

一日昭君辭

武陵王紀

塞外無春色邊城有風霜  
誰堪覽明鏡持許照紅粧

同前

沈約

朝發披香殿夕濟汾陰河  
於茲懷九折自此歛雙蛾  
沾粧疑湛露繞臆狀流波  
日見奔沙起稍覺轉蓬多  
胡風犯肌骨非直傷綺羅  
銜涕試南望關山鬱嵯峨  
始作陽春曲終成苦寒歌  
唯有三五夜明月暫經過

折一作逝狀一作比

同前

集題云昭君怨

陳後主

圖形漢宮裏遙聘單于庭  
狼山聚雲暗龍沙飛雪輕  
笳



吟度隴咽笛轉出關鳴啼妝寒葉下愁眉塞月生只餘  
馬上曲猶作別時聲

同前

集作王明君

張正見

塞樹暗胡塵霜樓明漢月淚染上春衣憂變華年髮

同前

藝文作陳明陰鏗集載云昭君怨郭本作唐誤

陳昭

跨鞍今永訣垂淚別親賓漢地隨行盡胡關逐望新交

河擁塞霧隴日暗沙塵唯有孤明月猶能遠送人

隨行盡一

作行將遠

同前

周王褒

蘭殿辭新寵椒房餘故情鴻飛漸南陸馬首倦西征寄

樂府

卷十五

七



書參漢使銜涕望秦城唯餘馬上曲猶作出關聲

同前

集題云昭君辭應詔

庾信

歛眉允祿塞遙望夫人城片片紅顏落雙雙淚眼生  
冰河牽馬渡雪路抱鞍行胡風入骨冷夜月照心明  
方調琴上曲變入胡笳聲

入一作作

同前

一云昭君辭英華作何遜

隋何妥

昔聞別鶴弄已自軫離情今來昭君曲還悲秋草并

同前

薛道衡

我本良家子充選入椒庭不蒙女史進更無畫師情  
蛾眉非本質蟬鬢改真形專由妾命薄誤使君恩輕  
啼落



渭橋路歎別長安城今夜寒草宿明朝轉蓬征卻望關  
山迥前瞻沙漠平胡風帶秋月嘶馬雜笳聲毛裘易羅  
綺氊帳代帷屏自知蓮臉歇羞看菱鏡明釵落終應棄  
髻解不須縈何用單于重詎假閼氏名馱馱聊彊食桐  
酒未能傾心隨故鄉斷愁逐塞雲生漢宮如有憶爲視

苑頭星

今夜一作夜依明朝一作朝  
逐帷一作金桐一作筒

昭君歎 二首

梁范靜婦沈氏

早信丹青巧重貨洛陽師千金買蟬髻百萬寫蛾眉

一作貨

作

今朝猶漢地明日入胡關情寄南雲反思逐北風還

一作



高堂歌吹  
遺子夢中還

楚王吟

梁張率

章臺迎夏日夢遠感春條  
風生竹籟響雲垂草綠饒  
相看重束素唯欣爭細腰  
不惜同從理但使一聞韶

楚妃歎

劉向列女傳曰楚姬楚莊王夫人也莊王好狩獵畢弋樊姬諫不止乃不食禽

獸之肉王嘗與虞丘子語以爲賢樊姬笑之  
王曰何笑也對曰虞丘子賢矣未忠也妾充  
後宮十一年而所進者九人賢於妾者二人  
與妾同列者七人虞丘子相楚十年而所薦  
者非其子孫則族昆弟未聞進賢退不肖也  
妾之笑不亦宜乎王於是以前孫叔敖爲令尹  
治楚三年而莊王以霸樂府解題曰陸機吳  
趨行云楚妃且莫歎明非近題也謝希逸琴  
論有楚妃  
歎七拍

晉石崇



蕩蕩大楚跨土萬里北據方城南接交趾西撫巴漢東  
被海涖五侯九伯是疆是理矯矯莊王淵渟岳峙冕旒  
垂精充續塞耳韜兂戢曜潛默恭已內委樊姬外任孫  
子猗猗樊姬體道履信旣紂虞丘九女是進杜絕邪佞  
廣啓令胤割歡抑寵居之不吝不吝實難可謂知幾化  
自近始著於閨闈光佐霸業邁德揚威羣后列辟式瞻  
洪規譬彼江海百川咸歸萬邦作歌身沒名飛

奏

右一曲  
晉樂所

同前

一云楚  
妃引

宋表伯文

玉墀滴淒露羅幌已依霜逢春每先絕爭秋欲幾芳



同前

梁簡文帝

幽閨情脉脉漏長宵寂寂草螢飛夜戶絲蟲繞秋壁薄  
笑未爲欣微歎還成戚金簪髻下垂玉筯衣前滴

楚妃吟

梁王筠

花早飛林中明鳥早歸庭前日暖春閨香氣亦霏霏香  
氣漂當軒清唱調獨顧慕含怨復含嬌蝶飛蘭復裊裊  
輕風入裙春可遊歌聲梁上浮春遊方有樂沈沈下羅  
幕

楚妃曲

吳均

春粧約春黛如月復如蛾玉釵照繡領金薄厠紅羅



王子喬

劉向列仙傳曰王子喬者周靈王太子晉也好吹笙作鳳鳴遊伊洛之間道人

浮丘公接以上嵩高山三十餘年後求之於山上見桓良曰告我家七月七日待我於緱氏山頭至時果乘白鶴駐山頭望之不得到舉手謝時人數日而去爲立祠於緱氏山下及嵩高之首焉

古辭

王子喬參駕白鹿雲中遨參駕白鹿雲中遨下遊來王子喬參駕白鹿上至雲戲遊遨上建逋陰廣里踐近高結仙宮過謁三台東遊四海五嶽山過蓬萊紫雲臺三王五帝不足令令我聖朝應太平養民若子事父明當究天祿永康寧玉女羅坐吹笛簫嗟行聖人遊八極鳴吐銜福翔殿側聖主享萬年悲吟皇帝延壽命

右一曲  
魏晉樂



奏所

同前

集云王太子贊姑從郭本收入

梁江淹

子喬好輕舉不待鍊銀丹控鶴去窈窕學鳳對鸞岵山  
無一春草谷有千年蘭雲衣下躑躅龍駕何時還

去一作上

同前

一題有行字

高允生

仙化非常道其義出自然王喬誕神氣白日忽升天  
曉御雲氣飄飄乘長煙寄想崆峒外翱翔宇宙間  
有佳期控鶴崇崖巔永與時人別一去不復旋

飄飄一作飄飄

同前

北魏高允

王少卿王少卿超升飛龍翔天庭遺儀景雲漢鼎允驚



電逝忽若浮騎日月從列星跨騰入廓踰窅冥尋元氣  
出天門窮覽有無究道根

### 四弦曲

古今樂錄曰張永元嘉技錄有四絃一曲蜀國  
四絃是也居相和之末三調之首古有四曲其  
張女四絃李延年四絃嚴郊四絃三曲闕蜀  
國四絃節家舊有六解宋歌有五解今亦闕

蜀國絃

集題蜀國絃  
歌篇十韻

梁簡文帝

銅梁指斜谷劒道望中區通星上分野作固下爲都雅  
歌因良守妙舞自巴渝陽城嬉樂盛劒騎鬱相趨五婦  
行難至百兩好遊娛牲祈望帝祀酒醑蜀侯妹江妃納  
重聘卓女愛將雛停弦時繫爪息吹治脣朱脫衫前錦



浪回扇避陽烏聞君握節返賤妾下城隅

指斜谷玉臺作望絕國望

中區英華作臨中區盛一作所  
爪一作介治脣朱一作更治朱

同前

隋盧思道

西蜀稱天府由來擅沃饒雲浮玉壘夕日映錦城朝南  
尋九折路東上七星橋琴心若易解今客豈難要

古樂苑卷第十五

終



古樂苑卷第十六

西吳 梅鼎祚 補正

東越 呂胤昌 校閱

相和歌辭 平調曲

平調曲

古今樂錄曰王僧虔技錄平調七曲一曰長歌  
行二曰短歌行三曰猛虎行四曰君子行五曰  
燕歌行六曰從軍行七曰鞠歌行荀氏錄所載  
十二曲傳者五曲武帝周西對酒文帝仰瞻並  
短歌行文帝秋風別日並燕歌行是也其七曲  
今不傳文帝功名明帝青青並長歌行武帝吾  
年明帝雙桐並猛虎行燕趙君子行左延年苦  
哉從軍行雉朝飛短歌行是也其器有笙笛筑  
瑟琴箏琵琶七種歌絃六部張永錄曰未歌之  
前有八部絃四器俱作在高下遊弄之後凡三



調歌絃一部竟輒作送歌絃今用器又有大歌絃一曲歌大婦織綺羅不在歌數唯平調有之卽清調相逢狹路間道隘不容車篇後章有大婦織綺羅中婦織流黃是也張錄云非管絃音聲所寄似是命笛理絃之餘王錄所無也亦謂之三婦豔詩

### 長歌行

樂府解題曰古辭言芳華不久當努力爲樂無至老大乃傷悲也魏改秦文帝

所賦西山一何高崔豹古今注長歌短歌言人壽命長短各有定分不可妄求按古詩云長歌正激烈魏文帝燕歌行云短歌微吟不能長晉傅玄豔歌行云咄來長歌續短歌然則歌聲有長短非言壽命也

### 古辭

青青園中葵朝露待日晞陽春布德澤萬物生光輝常恐秋節至焜黃華葉衰百川東到海何時復西歸少壯不努力老大徒傷悲



同前

滄浪詩評云文選長歌行一首青青園中葵郭茂倩樂府有兩篇次乃仙人騎白鹿

予疑岩岩山上亭以下其義不同當別是一首

古辭

仙人騎白鹿髮短耳何長導我上太華攬之獲赤幢來  
到主人門奉藥一玉箱主人服此藥身體一日康彊髮  
白更黑延年壽命長

岩岩山上亭皎皎雲間星遠望使心思遊子戀所生驅  
車出北門遙觀洛陽城凱風吹長棘夭夭枝葉傾黃鳥  
飛相追咬咬弄音聲竚立望西河泣下沾羅纓

藝文類聚載魏

文帝明津詩與此大同而逸其半

同前

魏明帝



靜夜不能寐耳聽衆禽鳴大乘育狐兔高墉多鳥聲壞  
宇何寥廓宿屋邪草生中心感時物撫劒下前庭翔佯  
於階際景星一何明仰首觀靈宿北辰奮休榮哀彼失  
羣燕喪偶獨煢煢單心誰與侶造房孰與成徒然喟有  
和悲慘傷人情余情偏易感懷往增憤盈吐吟音不徹  
泣涕沾羅纓

撫劒下前庭藝文  
作攬衣下閒庭

同前

晉傅玄

利害同根源賞下有甘鈞義門近  
塘獸口出通侯撫  
劒安所趨蠻方未順流蜀賊阻石城吳寇馮龍舟二軍  
多壯士聞賊如見讐投身効知己徒生心所羞鷹隼厲



天翼耻與燕雀遊成敗在縱者無令鷺鳥憂

同前

陸機

逝矣經天日悲哉帶地川寸陰無停晷尺波徒自旋  
年往迅勁矢時來亮急絃遠期鮮克及盈數固希全容華  
夙夜零體澤坐自捐茲物苟難停吾壽安得延俛仰逝  
將過倏忽幾何閒慷慨亦焉訴天道良自然但恨功名  
薄竹帛無所宣迨及歲未暮長歌乘我閑

徒自一作豈  
徒迅一作信

同前

宋謝靈運

倏爍夕星流昱奕朝露團粲粲烏有停  
泫泫豈暫安徂齡速飛電頽節驚驚湍覽物起悲緒顧已識憂端朽貌



改鮮色悴容變柔顏變改苟催促容色烏盤栢疊疊哀  
期迫靡靡壯志闌旣慙臧孫慨復愧楊子歎寸陰果有  
逝尺素竟無觀幸賒道念戚且取長歌歡

同前

梁元帝

當壚擅旨酒一卮堪十千無勞蜀山鑄扶授采金錢人  
生行樂爾何處不留連朝爲洛生詠夕作據梧眠忽茲  
忘物我優遊得自然

授一作受

同前

二首後一作鮑照

沈約

連連舟壑改微微市朝變來功嗣往迹莫武徂升彥局  
塗頓遠策畱懽限奔箭拊戚狀驚瀾循休擬回電歲去



芳願違年來苦心薦春貌既移紅秋林豈停禱一倍茂  
陵道寧思柏梁宴長戢兔園情永別金華殿聲微無惑  
簡丹青有餘絢幽籥且未調無使長歌倦限一作恨  
春隰萋綠柳寒墀積皓雪依依往紀盈霏霏來思結思  
結纏歲晏曾是掩初節初節曾不掩浮榮逐弦缺弦缺  
更圓合浮榮永沈滅色隨夏蓮變態與秋霜耄道迫無  
異期賢愚有同絕銜恨豈云忘天道無甄別功名識所  
職竹帛尋摧裂生外苟難尋坐爲長歎設

鰕鮒篇

一日鰕鮒篇樂府解題曰  
曹植擬長歌行爲鰕鮒

魏陳思王植



鰕鮒遊潢潦不知江海流燕雀戲藩柴安識鴻鵠遊世  
事此誠明大德固無儔駕言登五岳然後小陵丘俯觀  
上路人勢利惟是謀讐高念皇家遠懷柔九州撫劒而  
雷音猛氣縱橫浮汎泊徒嗷嗷誰知壯士憂

短歌行

二首六解古今樂錄曰王僧虔技錄云  
短歌行仰瞻一曲魏氏遺令使節朔奏

樂魏文製此辭自撫箏和歌歌者云貴官彈  
箏貴官卽魏文也此曲聲製最美辭不可入  
宴樂樂府解題曰短歌行魏武帝對酒當歌  
人生幾何晉陸機置酒高堂悲歌臨觴皆言  
當及時  
爲樂也

魏武帝

對酒當歌人生幾何譬如朝露去日苦多

一解慨當以慷

憂思難忘以何解愁唯有杜康

二解

青青子衿悠悠我心



但爲君故沈吟至今

三解

明明如月何時可輟憂從中來

不可斷絕

四解

呦呦鹿鳴食野之苹我有嘉賓鼓瑟吹笙

五解

山不厭高水不厭深周公吐哺天下歸心

六解

一曲晉樂

奏所

對酒當歌人生幾何譬如朝露去日苦多慨當以慷憂

思難忘何以解憂唯有杜康青青子衿悠悠我心呦呦

鹿鳴食野之苹我有嘉賓鼓瑟吹笙明明如月何時可

輟憂從中來不可斷絕越陌度阡枉用相存契濶談讌

心念舊恩月明星稀烏鵲南飛繞樹三匝何枝可依山

不厭高海不厭深周公吐哺天下歸心

右一曲本辭多越陌八句



對酒當歌人生幾何譬如朝露去日苦多明明如月  
何時可掇憂從中來不可斷絕月明星稀烏鵲南飛  
繞樹三匝無枝可依山不在高  
水不在深周公吐哺天下歸心

右藝文所載歐陽詢去其半猶  
為簡當語完而意足也今附錄

同前 六解

武帝

周西伯昌懷此聖德三分天下而有其二脩奉貢獻臣

節不墜崇侯讒之是以拘繫一解後見赦原賜之斧鉞得

使征伐為仲尼所稱達及德行猶奉事殷論叙其美二解

齊桓之功為霸之首九合諸侯一匡天下一匡天下不

以兵車正而不譎其德傳稱三解孔子所歎并稱夷吾民

受其恩賜與廟胙命無下拜小白不敢爾天威在顏咫尺



尺

四解

晉文亦霸躬奉天王受賜珪瓚鉅鬯彤弓盧弓矢

千虎賁三百人

五解

威服諸侯師之者尊八方聞之名亞

齊桓河陽之會詐稱周王是以其名紛葩

六解

右一曲晉樂所奏

同前

六解

魏文帝

仰瞻帷幙俯察几筵其物如故其人不存

一解

神靈倏忽

棄我遐遷靡瞻靡恃泣涕連連

二解

呦呦遊鹿銜草鳴麇

翩翩飛鳥挾子巢棲

三解

我獨孤煢懷此百離憂心孔疚

莫我能知

四解

人亦有言憂令人老嗟我白髮生一何早

五解

長吟永歎懷我聖考曰仁者壽胡不是保

六解

右一曲魏樂

所奏

者

宋書作曰

樂府

卷之六

六



樂苑  
卷一  
同前

魏明帝

翩翩春燕端集余堂陰匿陽顯節運自常厥貌淑美玄  
衣素裳歸仁服德雌雄頡頏執志精專潔行馴良銜土  
繕巢有式宮房不規自圓無矩而方

同前

晉傅玄

長安高城層樓亭亭干雲四起上貫天庭蜉蝣何整行  
如軍征蟋蟀何感中夜哀鳴蚍蜉愉樂粲粲其榮寤寐  
念之誰知我情昔君視我如掌中珠何意一朝棄我溝  
渠昔君與我如影如形何意一去心如流星昔君與我  
兩心相結何意今日忽然兩絕



同前

陸機

置酒高堂悲歌臨觴人生幾何逝如朝霜時無重至華  
不再揚蘋以春暉蘭以秋芳來日苦短去日苦長今我  
不樂蟋蟀在房樂以會興悲以別章豈曰無感憂爲子  
忘我酒旣旨我肴旣臧短歌可詠長夜無荒

同前

梁張率

君子有酒小人鼓缶乃布長筵式宴親友盛壯不留容  
華易朽如彼槁葉有似過牖往日莫淹來期無久秋風  
悴林寒蟬鳴柳悲自別深懽由會厚豈云不樂與子同  
壽我酒旣盈我看伊臯短歌是唱孰知身後



同前

二首郭本作一首

周徐謙

窮通皆是運榮辱豈關身不願門前客看時逢故人  
意氣青雲裏爽朗煙霞外不羨一囊錢唯重心襟會

同前

隋辛德源

馳射罷金溝戲笑上雲樓少妻鳴趙瑟侍妓轉吳謳杯  
度浮香滿扇舉細塵浮星河耿涼夜飛月豔新秋忽念  
奔駒促彌欣執燭遊

銅雀臺

一曰銅雀妓鄴都故事魏武帝遺命諸子曰吾死之後葬於鄴之西岡上與西

門豹祠相近無藏金玉珠寶餘香可分諸夫人不命祭吾妾與伎人皆著銅雀臺臺上施六尺牀下總帳朝晡上酒脯張繡之屬每月朝十五輒向帳前作伎汝等時登臺望吾西



陵墓田故陸機弔魏武帝文曰揮清絃而獨  
奏薦脯糒而誰嘗悼總帳之冥漠怨西陵之  
茫茫登雀臺而羣悲佇美目其何望按銅雀  
臺在鄴城建安十五年築其臺最高上有屋  
一百二十間連接棖棟侵徹雲漢鑄大銅雀  
置于樓顛舒翼奮尾勢若飛動因名爲銅雀  
臺樂府解題曰後人  
悲其意而爲之詠也

集云同謝諮議詠銅  
雀臺郭本作銅雀伎

齊謝朓

總帷飄井幹  
罇酒若平生  
鬱鬱西陵樹  
詎聞歌吹聲  
芳襟染淚迹  
嬋娟空復情  
玉座猶寂寞  
況乃妾身輕

同前

陳張正見

淒涼銅雀晚  
搖落墓田通  
雲慘當歌日  
松吟欲舞風  
人疏瑤席冷  
曲罷總帷空  
可惜年將汨  
俱盡望陵中



同前

荀仲舉

高臺秋色晚直望已悽然况復歸風便松聲入斷絃淚  
逐梁塵下心隨團扇捐誰堪三五夜空對月光圓

銅雀妓

梁何遜

秋風木葉落蕭瑟管絃清望陵歌對酒向帳舞空城寂  
寂簷宇曠飄飄帷幔輕曲終相顧起日暮松柏聲

同前

劉孝綽

雀臺三五日歌吹似佳期定對西陵晚松風飄素帷危  
絃斷復續賤妾傷此時何言畱客袂翻掩望陵悲

歌一作絃

復續一作更接賤妾傷此時一作心傷於此時何一作誰翻一作還



同前

江淹

武皇去金閣英威長寂寞雄劍頓無光雜佩亦銷爍秋  
至明月圓風傷白露落清夜何湛湛孤燭映蘭幙撫影  
愴無從惟懷憂不薄瑤色行應罷紅芳幾爲樂徒登歌  
舞臺終成螻蟻廓

銅雀悲

齊謝朓

落日高城上餘光入總帷寂寂深松晚寧知琴瑟悲

置酒高堂上

一作置酒  
高樓上

宋孔欣

置酒宴友生高會臨踈櫺芳俎列嘉肴山疊滿春青廣  
樂充堂宇絲竹橫兩楹邯鄲有名倡承閒奏新聲八音



何寥亮四座同歡情舉觴發湛露銜杯詠鹿鳴觴謠可  
相娛揚解意何榮顧歡來義士暢哉矯天誠朝日不夕  
盛川流常宵征生猶懸水溜死若波瀾停當年貴得意  
何能競虛名

當置酒

陸機集  
載此誤

梁簡文帝

置酒宴佳賓矚迥臨飛觀絕嶺隔天餘長嶼橫江半日  
色花上綺風光水中亂三益旣歲蕤四始方葱粲

猛虎行

古辭

飢不從猛虎食暮不從野雀棲野雀安無巢游子爲誰驕

同前

魏文帝



與君媾新歡託配於二儀充列于紫微升降焉可知梧  
桐攀鳳翼雲雨散洪池

同前

王僧虔伎錄曰荀錄載  
明帝雙桐一篇今不傳

明帝

雙桐生空井枝葉自相加通泉浸其根玄雲潤其柯上  
有雙棲鳥交頸鳴相和何意行路者秉丸彈是窠

闕

同前

晉陸機

渴不飲盜泉水熱不息惡木陰惡木豈無枝志士多苦  
心整駕肅時命杖策將遠尋饑食猛虎窟寒棲野雀林  
日歸功未建時往歲載陰崇雲臨岸駭鳴條隨風吟靜  
言幽谷底長嘯高山岑急弦無懦響亮節難爲音人生



誠未易曷云開此襟眷我耿介懷俯仰愧古今

同前

二首後首郭本無名氏

宋謝惠連

貧不攻九疑玉倦不憩三危峰九疑有或號三危無安  
容美物標賢用志士厲奇蹤如何祇遠役王命宜肅恭  
伐鼓功未著振旅何時從

猛虎潛深山長笑自生風人謂客行樂客行苦心傷

雙桐生空井

梁簡文帝

季月對桐井新枝雜舊株晚葉藏栖鳳朝花拂曙烏還

看西子照銀牀繫轡轡

西一作雅

君子行

又有君子有所思行辭古與此不同

古辭



君子防未然不處嫌疑間瓜田不納履李下不正冠嫂  
叔不親授長幼不比肩勞謙得其柄和光甚獨難周公  
下白屋吐哺不及餐一沐三握髮後世稱聖賢

曹植集  
亦載此

同前

晉陸機

天道夷且簡人道險而難休咎相乘躡翻覆若波瀾去  
疾苦不遠疑似實生患近火固宜熱履冰豈惡寒掇蜂  
滅天道拾塵惑孔顏逐臣尚何有棄友焉足歎福鍾恒  
有兆禍集非無端天損未易辭人益猶可歡朗鑒豈遠  
假取之在傾冠近情苦自信君子防未然

同前

梁簡文帝



樂府 卷十六  
君子懷琬琰不使涅塵淄從容子雲閣寂寞仲舒帷多  
謝悠悠子管窺良可悲

同前

沈約

良御惑燕楚妙察亂澠淄隄傾由漏壤垣隙自危基  
翬途或妄踐黨義勿輕持

同前

戴暘

畫野依德星開鄺對廉水接越稱交讓連樹名君子數  
非唯二失升階無三止探甌不疑塵正冠還避李寄言  
遽伯玉無爲嗟獨恥

燕歌行

七解

樂府解題晉樂奏魏文帝秋風  
別日二曲言時序遷換行役不歸婦人



怨曠無所訴也廣題言良  
人從役於燕而為此曲  
魏文帝

秋風蕭瑟天氣涼草木搖落露為霜

解一

羣燕辭歸鴈南

翔念君客遊多思腸

解二

慊慊思歸戀故鄉君何淹留寄

他方

解三

賤妾煢煢守空房憂來思君不敢忘

解四

不覺淚

下沾衣裳援瑟鳴絃發清商

解五

短歌微吟不能長明月

皎皎照我牀

解六

星漢西流夜未央牽牛織女遙相望爾

獨何辜限河梁

解七

右一曲晉樂所奏  
鴈宋書  
作鴈多思腸一作思斷腸瑟作琴

同前

六解

前人

別日何易會日難山川悠遠路漫漫

解一

鬱陶思君未敢

言寄書浮雲往不還

解二

涕零雨面毀形顏誰能懷憂獨



不歎

三解

耿耿伏枕不能眠披衣出戶步東西

四解

展詩清

歌聊自寬樂往哀來摧心肝悲風清厲秋氣寒羅帷徐

動經秦軒

五解

仰戴星月觀雲間飛鳥晨鳴聲氣可憐留

連顧懷不自存

六解

右一曲晉樂所奏

書一作聲

形一作容心一作肺戴一作看鳥一作

鷓鴣自一

作能

別日何易會日難山川悠遠路漫漫鬱陶思君未敢言

寄聲浮雲往不還涕零雨面毀容顏誰能懷憂獨不歎

展詩清歌聊自寬樂往哀來摧肺肝耿耿伏枕不能眠

披衣出戶步東西仰看星月觀雲間飛鳥晨鳴聲可憐

留連顧懷不能存

右一曲本辭



同前

魏明帝

白日晼晼忽西傾  
霜露慘淒塗階庭  
秋草捲葉摧枝莖  
翩翩飛蓬常獨征  
有似遊子不安寧

同前

晉陸機

四時代序逝不追  
寒風習習落葉飛  
蟋蟀在堂露盈墀  
念君遠遊恒苦悲  
君何緬然久不歸  
賤妾悠悠心無違  
白日既沒明燈輝  
夜禽赴林匹鳥棲  
雙鳴關關宿河湄  
憂來感物淚不晞  
非君之念思爲誰  
別日何早會來遲

逝一作遠遲一作堦遠一作客夜一作寒別日一作月別

同前

宋謝靈運



孟冬初寒節氣成悲風入閨霜依庭秋蟬噪柳燕棲楹  
念君行役怨邊城君何崎嶇久徂征豈無膏沐感鸛鳴  
對君不樂淚沾纓闥牕開幌弄秦箏調絃促柱多哀聲  
遙夜明月鑒帷屏誰知河漢淺且清展轉思服悲明星

同前

謝惠連

四時推遷迅不停三秋蕭瑟葉解輕飛霜被野鴈南征  
念君客遊羈思盈何爲淹留無歸聲愛而不見傷心情  
朝日潛輝華燈明林鵲同棲渚鴻并接翮偶羽依蓬瀛  
仇依旅類相和鳴余獨何爲志無成憂緣物感淚沾纓

同前

梁元帝



燕趙佳人本自多，遼東少婦學春歌。  
黃龍戍北花如錦，玄菟城南月似蛾。  
如何此時別夫婿，金羈翠眊往交河。  
還聞入漢去燕營，怨妾愁心百恨生。  
漫漫悠悠天未曉，遥遥夜夜聽寒更。  
自從異縣同心別，偏恨同時成異節。  
橫波滿臉萬行啼，翠眉暫斂千重結。  
並海連天合不開，那堪春日上春臺。  
唯見遠舟如落葉，復看遙舸似行杯。  
沙汀夜鶴嘯羈雌，妾心無趣坐傷離。  
翻嗟漢使音塵斷，空傷賤妾燕南垂。

南一作前

同前

蕭子顯

風光遲舞出青蘋，蘭條翠鳥鳴發春。  
洛陽梨花落如雪，

樂苑

卷十六

七



河邊細草細如茵  
桐生井底葉交枝  
今看無端雙燕離  
五重飛樓入河漢  
九華閣道暗清池  
遙看白馬津上吏  
傳道黃龍征戍兒  
明月金甌徒照妾  
浮雲玉葉君不知  
思君昔去柳依依  
至今八月避暑歸  
明珠蠶繭勉登機  
鬱金香蘂持香衣  
洛陽城頭雞欲曙  
丞相府中烏未飛  
夜夢征人縫狐貉  
私憐織婦裁錦緋  
吳刀鄭錦絡寒閨  
夜被薄芳年海上  
水中鳬日暮寒夜  
空城雀

徒一作從  
持一作特

同前

北史本傳曰褒仕梁時作燕歌妙盡塞北  
苦寒之言元帝及諸文士和之而競爲悽

切及江陵爲魏師所  
破元帝出降方驗焉

周王褒

初春麗日鶯欲嬌  
桃花流水沒河橋  
薔薇花開百重葉



楊柳拂地散千條  
隴西將軍號都護  
樓蘭校尉稱嫖姚  
自從昔別春燕分  
經年一去不相聞  
無復漢地長安月  
唯有漠北薊城雲  
淮南桂中明月影  
流黃機上織成文  
充國行軍屢築營  
陽史討虜陷平城  
城下風多能却陣  
沙中雪淺距停兵  
屬國少婦猶年少  
羽林輕騎散征行  
遙聞陌頭採桑曲  
猶勝邊地胡笳聲  
胡笳向暮使人泣  
還使閨中空佇立  
桃花落杏花舒  
桐生井底寒葉疎  
試爲來看上林鴈  
必有遙寄隴頭書

長安一作關山還使  
一作長還必一作應

同前

庾信

代北雲氣晝昏昏  
千里飛蓬無復根  
寒鴈丁丁渡遼水



桑葉紛紛落薊門  
晉陽山頭無箭竹  
踈勒城中乏水源  
屬國征戍久離居  
陽關音信絕能踈  
願得魯連飛一箭  
持寄思歸燕  
將書渡遼本自有將軍寒風蕭蕭生水紋  
妾驚甘泉足烽火  
君訝漁陽少陣雲  
自從將軍出細柳  
蕩子空牀難獨守  
盤龍明鏡向秦嘉  
辟惡生香寄韓壽  
春分燕來能幾日  
二月蠶眠不復久  
洛陽遊絲百丈連  
黃河春冰千片穿  
桃花顏色好如馬  
榆莢新開巧似錢  
蒲萄一杯千日醉  
無事九轉學神仙  
定取金丹作幾服  
能令華表得千年

丁丁一作咤咤少一作多  
不復久丁臺作不能食

從軍行

五首集云從軍詩魏志建安二十年曹公西征張魯侍中王粲作詩以美其事



涼風四首從征吳作本非  
樂府今姑從郭本收入  
魏王粲

從軍有苦樂但問所從誰所從神且武焉得久勞師相  
公征關右赫怒震天威一舉滅獯虜再舉服羌夷西收  
邊地賊忽若俯拾遺陳賞越丘山酒肉踰川坻軍中多  
飫饒人馬皆溢肥徒行兼乘還空出有餘資拓地三千  
里往返一如飛歌舞入鄴城所願獲無違晝日處大朝  
日暮薄言歸外參時明政內不廢家私禽獸憚爲犧良  
苗實已揮竊慕負鼎翁願厲朽鈍姿不能效沮溺相隨  
把鋤犁熟覽夫子詩信知所言非

李善本無竊慕二句  
如一作若晝一作盡

涼風厲秋節司典告詳刑我君順時發桓桓東南征汎



舟蓋長川陳卒被隰垌征夫懷親戚誰能無戀情拊衿  
倚舟檣眷言思鄴城哀彼東山人喟然感鸛鳴日月不  
安處人誰獲恒寧昔人從公旦一徂輒三齡今我神武  
師暫往必速平棄余親睦恩輸力竭忠貞懼無一夫用  
報我素餐誠夙夜自忤性思逝若抽縈將秉先登羽豈  
敢聽金聲

戀一作此恒一作常太平御覽載祭從軍詩  
有云樓船凌洪波奮戈刺群虜豈征吳時邪

從軍征遐路討彼東南夷方舟順廣川薄暮未安坻白  
日半西山桑梓有餘暉蟋蟀夾岸鳴孤鳥翩翩飛征夫  
心兩懷悽愴令吾悲下船登高防草露霑我衣廻身赴  
牀寢此愁當告誰身服干戈事豈得念所私卽戎有受



命茲理不可違

兩一作多  
悽一作惻

朝發鄴都橋暮濟白馬津  
逍遙河隄上左右望我軍連  
舫踰萬艘帶甲千萬人  
率彼東南路將定一舉勳籌策  
運帷幄一由我聖君  
恨我無時謀譬諸具官臣  
鞠躬中堅內微畫無所陳  
許歷爲完士一言猶敗秦  
我有素餐責誠愧伐檀人  
雖無鈇刀用庶幾奮薄身  
猶一作獨  
悠悠涉荒路靡靡我心愁  
四望無煙火但見林與丘  
城郭生榛棘蹊徑無所由  
萑蒲竟廣澤葭葦夾長流  
日夕涼風發翩翩漂吾舟  
寒蟬在樹鳴鸛鵠摩天遊  
客子多悲傷淚下不可收  
朝入譙郡界曠然消人憂  
雞鳴達四



境黍稷盈原疇館宅充廛里女士滿莊廬自非聖賢國

誰能享斯休詩人美樂土雖客猶願留

廛一作酈女士一作士女

同前

二首王僧虔技錄云荀錄所載左延年苦哉行一篇今不傳樂府解題曰從軍行皆

軍旅苦辛之辭苦哉行從軍五更轉並出此

左延年

苦哉邊地人一歲三從軍三子到燉煌二子詣隴西五

子遠鬪去五婦皆懷身

闕後首見初學記

從軍何等樂一駢乘雙駃鞍馬照人白龍驤自動作

闕

同前

周王褒有遠征人出此

晉陸機

苦哉遠征人飄飄窮四遐南陟五嶺巔北戍長城阿谿谷深無底崇山鬱嵯峨奮臂攀喬木振迹涉流沙隆暑



固已慘涼風嚴且苛夏條集鮮藻寒氷結衝波胡馬如  
雲屯越旗亦星羅飛鋒無絕影鳴鏑自相和朝餐不免  
胃夕息常負戈苦哉遠征人拊心悲如何

飄飄窮四遐一作飄飄窮

西河谿谷深無底一作深谷  
邈無底集一作焦餐一作食

### 同前

宋顏延之

苦哉遠征人畢力幹時艱秦初略揚越漢世爭陰山地  
廣旁無界岳阿上虧天嶠霧下高鳥氷沙固流川秋飈  
冬未至春液夏不涓閩烽指荆吳胡埃屬幽燕橫海咸  
飛驪絕漠皆控弦馳檄發章表軍書交塞邊接鏑赴陣  
首卷甲起行前羽驛馳無絕旌旗晝夜懸臥伺金柝響



起候亭燧煙逝矣遠征人惜哉私自憐

同前

見太平御覽

謝惠連

趙騎馳四牡吳舟浮三翼弓茅有恒用矛鋌無暫息

闕

同前

二首

梁簡文帝

貳師惜善馬樓蘭貪漢財前年出右地今歲討輪臺魚  
雲望旗聚龍沙隨陣開冰城朝浴鐵地道夜銜枚將軍  
號令密天子璽書催何時反舊里遙見下機來

雲中亭障羽檄驚甘泉烽火通夜明貳師將軍新築營  
嫖姚校尉初出征復有山西將絕世愛雄名三門應遁  
甲五壘學神兵白雲隨陣色蒼山答鼓聲迤邐觀鵝翼



參差鴈行先平小月障却滅大宛城善馬還長樂黃  
金付水衡小婦趙人能鼓瑟侍婢初笄解鄭聲庭前桃  
花飛已合必應紅粧來起迎

作欲來起迎  
一作起見迎

障一作嶂愛一作受障一  
作施桃花一作柳絮已一

同前

集云和王僧辨從  
軍姑從郭本收入

梁元帝

寶劍飾龍淵長虹畫彩船山虛和撓管水淨寫樓船連  
雞隨火度燧象帶烽然洞庭晚風急瀟湘夜月圓荀令  
多文藻臨戎賦雅篇

同前

沈約

惜哉征夫子憂恨良獨多浮矢出鯁海東馬渡交河雪



樂府 卷十六 十九  
縈九折嶺風捲萬里波維舟無夕島秣驥乏平莎凌濤  
富驚沫援木闕垂蘿江颺鳴壘嶼流雲照層阿玄埃晦  
朔馬白日照吳戈寢興流復怨寤寐起還歌晨裝豈輟  
警夕壘詎淹和苦哉遠征人悲矣將如何闕一作關

同前

戴嵩

長安夜刺閨胡騎白銅鞮詔書發隴右召募取關西劒  
懸三尺鞘鎧暴七重犀督軍鳴戰鼓遙夜數更輦侵星  
出柳塞際晚入榆溪秦涇含藥鵠晉火逐飛雞通泉開  
地道望敵豎雲梯陰山日不暮長城風自淒弓寒折錦  
韉馬凍滑斜蹄燕旗竿上晚羌笛管中嘶登山試下趙



憑軾且平齊當今函谷上唯見一丸泥

見一作作用

同前

吳均

男兒亦可憐立功在北邊陣頭橫却月馬腹帶連錢懷  
戈發隴坻乘凍至遼邊微誠君不愛終自直如弦

同前

二首前首集云李都尉陵從軍後首云古  
意報袁功曹並非樂府今姑從郭本收入

江淹

樽酒送征人踟躕在親宴日暮浮雲滋握手淚如霰悠  
悠清水川嘉魴得所荐而我在萬里結友不相見袖中

有短書願寄雙飛燕

友一作髮

從軍出隴北長望陰山雲涇渭各流異恩情於此分故



人贈寶劒鏤以瑤華文一言鳳獨立再說鸞無羣何得  
晨風起悠哉凌翠氛黃鵠去千里垂淚爲報君

同前

英華作  
蕭子雲

蕭子顯

左角名王侵漢邊輕薄良家惡少年縱橫向沮澤凌厲  
取山田黃塵不見景飛蓬恒滿天邊功封浞野竊寵劫  
祁連春風春月將進酒妖姬舞女亂君前

劫一作拜

同前

劉孝儀

冠軍親挾射長平自合圍木落雕弓燥氣秋征馬肥賢  
王皆屈膝幕府復申威何謂從軍樂往返速如飛

同前

二首後首集云星名從  
軍詩姑從郭本收入

陳張正見



胡兵屯薊北漢將起山西故人輕百戰聊欲定三齊風  
前賁畫角雲上舞飛梯鴈塞秋聲遠龍沙雲路迷燕然  
自可勒函谷詎須泥

將軍定朔邊刁斗出祁連高柳橫長塞榆關接遠天井  
泉含陣竭風火映山然欲知客心斷旄旌萬里懸

同前

周趙王招

遼東烽火照甘泉薊北亭障接燕然水凍菖蒲未生節  
關寒榆葉不成錢

同前

集云同盧  
記室從軍

庾信

河圖論陣氣金匱辨星文地中鳴鼓角天上下將軍函



犀恒七屬浴鐵本千羣飛梯聊度絳合弩暫凌汾寇陣  
先中斷妖營卽兩分連烽對嶺度嘶馬隔河聞箭飛如  
疾雨城崩似壞雲英王於此戰何用武安君

同前 二首

王褒

兵書久閑習征戰數曾經講戎平樂觀攬劒羽林亭西  
征度踈勒東驅出井陘牧馬濱長渭營軍毒上涇平雲  
如陣色半月類城形羽書封信璽詔使動流星對岸流  
沙白緣河柳色青將幕恒臨斗旌門常背刑勲封瀚海  
石功勒燕然銘兵勢因麾下軍圖送掖庭誰憐下玉筯

向暮掩金屏

攬劒一作學戲



黃河流水急驄馬送征人  
谷望河陽縣橋度小平津  
年少多遊俠結客好輕身  
代風愁櫪馬胡霜宜角筋  
羽書勞警急邊鞍倦苦辛  
康居因漢使盧龍稱魏臣  
荒戍唯看柳邊城不識春  
男兒重意氣無爲羞賤貧

同前

隋盧思道

朔方烽火照甘泉長安飛將出祁連  
犀渠玉劒良家子白馬金羈俠少年  
平明偃月屯右地薄暮魚麗逐左賢  
谷中石虎經銜箭山上金人曾祭天  
天涯一去無窮已薊門迢遞三千里  
朝見馬嶺黃沙合夕望龍城陣雲起  
庭中奇樹已堪攀塞外征人殊未還  
白雲初下天山外



浮雲直向五原間  
關山萬里不可越  
誰能坐對芳菲月  
流水本自斷人腸  
堅冰舊來傷馬骨  
邊庭節物與華異  
冬霰秋霜春不歇  
長風蕭蕭渡水來  
歸鴈連連映天沒  
從軍行從軍行  
萬里出龍庭  
單于渭橋今已拜  
將軍何處覓功名

同前

選詩外編  
作塞上

明餘慶

三邊烽亂驚十萬  
且橫行風卷常山陣  
笳喧細柳營  
劒花寒不落弓月  
曉逾明會取淮南地  
持作朔方城

淮南一作

河西

同前

一首

虞世南



塗山烽候驚弭節度龍城冀馬樓蘭將燕犀上谷兵劒  
寒花不落弓曉月逾明凜凜嚴霜節冰壯黃河絕蔽日  
卷征蓬浮天散飛雪全兵值月滿精騎乘膠折結髮早  
驅馳辛苦事旌麾馬凍重關冷輪摧九折危獨有西山  
將年年屬數奇

西山疑作山西

烽火發金微連營出武威孤城塞雲起絕陣虜塵飛俠  
客吸龍劒惡少縵胡衣朝摩骨都壘夜解谷蠡圍蕭關  
遠無極蒲海廣難依沙磴離旌斷晴川候馬歸交河梁  
已畢燕山旆欲飛方知萬里相戾服有光輝

烽一作燿誤

遠征人

周王褒



黃河流水急驅馬送征人谷望河陽縣橋度小平津

從軍行五更轉

五首樂苑曰五更轉商調曲按伏知道已有從軍辭則五更轉

蓋陳已

前曲也

陳伏知道

一更刁斗鳴校尉連連城遙聞射鵰騎懸憚將軍名

二更愁未央高城寒夜長試將弓學月聊持劒比霜

三更夜警新橫吹獨吟春強聽梅花落誤憶柳園人

四更星漢低落月與雲齊依稀北風裏胡笳雜馬嘶

五更催送籌曉色映山頭城烏初起堞更人悄下樓

悄一作

笑作

鞠歌行

古今樂錄曰王僧虔技錄平調又有鞠歌行今無歌者陸機序曰按漢宮閣有



合章鞠室靈芝鞠室後漢馬防第宅上臨道閣通池鞠城彌於街路鞠歌將謂此也又東阿王詩連騎擊壤或謂蹴鞠乎三言七言言雖奇寶名器不遇知己終不見重願逢知己以託意焉

### 晉陸機

朝雲升應龍攀乘風遠遊騰雲端鼓鐘歇豈自歡急弦  
高張思和彈時希值年夙愆循已雖易人知難王陽登  
貢公歡罕生既沒國子歎嗟千載豈虛言邈矣遠念情  
愴然

### 同前

### 宋謝靈運

德不孤今必有鄰唱和之契冥相因譬如虬虎今來風  
雲亦如形聲影響陳心歡賞今歲易淪隱玉藏彩疇識



真叔身顯夷吾親郢旣歿匠寢斤覽古籍信伊人永言  
知己感良辰

同前

謝惠連

翔馳騎千里姿伯樂不舉誰能知南荆璧萬金貨卞和  
不斷與石離年難留時易隕厲志莫賞徒勞疲沮齊音  
溺趙吹匠石善運郢不危古綿眇理參差單心慷慨雙  
淚垂

古樂苑卷第十六

終







嘉叔子... 效... 信... 人... 永...

同...

謝惠連

謝惠連... 知南荆壁萬金貨市和... 莫官徒勞疲沮奔音... 心慷慨雙...

古詩... 卷第十六







